


楓窗小牘
黃氏日抄古今紀要逸編





楓窗小牘

袁 頤 士
袁 姚
撰 頤 士
續 頤 士
校 麟 士

叢書集成初編

(補印本)

楓窗小牘及其他一種

一九三九年十二月初版
一九五九年十月補印

商務印書館出版

上海市印刷四廠印刷

楓窗小牘敘

楓窗小牘。不著撰人姓名。特檢所載先三老一段。與隸釋袁良碑對質。因知其人袁姓。而牘中東坡手書。所云彥方者。卽其大父贊善公也。但文忠集目。祇云與人而已。至稱其父。每日家大夫。不知何官。曾爲良嶽。蓼綠華臺作頌。定亦禁近班列。又云。曾王大母得封縣君。從祖嘗倅鄭。子曰博士頤。亦是汴中衣簪。喬舊。惟此翁若無官。而留意當世者。其所記載。有大關係。如趙普醜章及玉牒宗室同姓事。則是上果忘其創業。下自信其背盟。知靖康之禍。高嗣之斬。所從來矣。惟名園記謂普歸洛月餘。便卒。洛去汴四百五十里。醜章乘風吹墮太遠。又如張李醉醒志。清論家人一卦。盧之翰不謝錢若水。皆足補宋史之闕。其他細碎。多杭汴見聞耳。庚戌春。嘗以質之金壇王損庵太史。云此中多史外別聞。而于惠生王伯弼各稱其鸚鵡文佳。余獨喜燕丹一敘。最爲雄爽簡妙。頃見吳伯霖言家亦藏有此本。爲條賞歎賞。第云東坡釋相國寺詩。必謫外時書謎壁間。後來解破耳。不然。卽慧爭德祖。捷給不能至此。併識以咨博雅。海鹽姚士麟叔祥敘。

陳眉公訂正楓窗小牘卷之上

宋 百歲老人袁 駿撰 男博士袁 頤續 海鹽姚士麟校

余迫猝渡江。僑寓臨安山中。父書手定。都爲烏有。第日對窗西鳥柏。省念舊聞。得數十事。錄之以備遺忘。時晚秋蕭瑟。喜有丹葉殘霞。來射几案。會錄成。輒呼酒落之。名曰楓窗小牘。

藝祖受命元年秋。三佛齊來貢。時尚不知皇宋受禪也。貢物有通天犀。中有形如龍。繫一蓋。其龍形騰上。而尾少左向來。其文卽宋字也。眞主受命。豈偶然哉。藝祖卽以此犀爲帶。每郊廟則繫之。

子僑家後圃。有一大井。是武肅王外祖家舊物。井上有文曰。於維此井。淳育坎靈。有萃有郃。實此儲英。時有長虹。上貫青冥。是惟王氣。宅相先徵。爰啓霸主。奠綏蒼氓。沛膏漸澤。配德東溟。臣羅隱謹頌。

太祖征李筠。以太宗爲大內都點檢。汴民驚曰。點檢作天子矣。更爲一天子地邪。此又人口木簡也。

太平興國中。蜀人張思訓。製上渾儀。其製與舊儀不同。最爲巧捷。起爲樓閣數層。高丈餘。以木偶爲七直人。以直七政。自能撞鐘擊鼓。又爲十二神。各直一時。至其時。卽自執辰牌。循環而出。余大王父贊善公嘗入文明殿漏室中見之。

國初杭粵蜀漢未入版圖。總戶九十六萬七千五百五十三。至開寶末。增至二百五十萬八千六十五戶。太宗拓定南北。戶猶三百五十七萬四千二百五十七。此後遞增。至徽廟。有一千八百七十八萬之多。億

可謂盛矣。及乘輿南渡。江淮以北。悉入虜庭。今上主戶亦至一千一百七十萬五千六百有奇。生息之繁。視宣和已前。僅減七百萬耳。尙令此虜。假氣游魂。何也。

太宗命儒臣。輯太平廣記。時徐鉉實與編纂。稽神錄。鉉所著也。每欲採擷。不敢自尊。輒示宋白。使問李昉。昉曰。徐率更以博信天下。乃不自信。而取信于宋拾遺乎。詎有率更言無稽者。中探無疑也。于是此錄遂得見收。

楊億作二京賦。旣成。好事者多爲傳寫。有輕薄子。書其門曰。孟堅再生。平子出世。文選中間。恨無隙地。楊亦書門答之曰。賞惜違顏。事等隔世。雖書我門。不爭此地。余謂此齊東之言也。楊公長者。肯相較若爾耶。道君皇帝。改元宣和。人或離合其字曰。一旦宋亡。此與蕭歸離合。後周宣政。爲宇文亡日同。

太常普律官田琮家。庭中嘗有光怪。掘地得古鐸三枚。一黃鐘。一中呂。一土死無聲。又一玉管。校長于古玉管。蓋漢晉間物也。其年遂遷職。

趙韓王疾。夜夢甚惡。使道流上章禳謝。道流請章旨。趙難言之。從枕躍起。索筆自草曰。情關母子。弟及自出。于人謀計。協臣民。子賢難違乎天意。乃憑幽祟。逞此強陽。瞰臣氣血之衰。肆彼魘呵之厲。倘合帝心。誅既不誣。管蔡幸原臣死。事堪永謝。朱均云云。密封令勿發。向空焚之。火正熱亟。而此章爲大風所掣。吹墮朱雀門。爲人所得。傳誦于時。竟不起。

淳化三年冬十月。太平興國寺牡丹紅紫盛開。不踰春月。冠蓋雲擁。僧舍填駢。有老妓題寺壁云。曾趁南

風看幾巡。冒霜開喚滿城人。殘脂剩粉憐猶在。欲向彌陀借小春。此妓遂復車馬盈門。古人稱士農工商爲四民。今有六民。真宗初卽位。王禹偁上五事。有云。古者井田之法。農卽兵也。今執戈之士不復事農。是四民之外。又一民也。自佛教入中國。度人修寺。不畊不蠶。而具衣食。是五民之外。又一民也。

李文靖賢相也。與張齊賢稍不協。齊賢竟以被酒失儀罷相。時人語曰。李相太醒。張相太醉。此亦里巷公論也。

汴京閨閣粧抹凡數變。崇寧間。少嘗記憶。作大髻方額。政宣之際。又尙急把垂肩。宣和已後。多梳雲尖巧額。髻撐金鳳。小家至爲剪紙襯髮。膏沐芳香。花鞦弓履。窮極金翠。一襪一領。費至千錢。今聞虜中閨飾復爾。如瘦金蓮方瑩面丸。遍體香皆自北傳南者。

邢昺以九經及第。鬱爲儒者。乃傾意欽若。納身垢汚。爲士流所薄。嘗奉敕撰爾雅疏義。其後太學生郭盛言。昔人不分老子與韓非同傳。郭注邢疏。無論周公不享其意。卽先人得無稱寃地下。且郭迂逆教。邢附欽若。爾雅近正。今則近邪。盛舉九經乞辭此疏。時邢自稱子才之裔。太學中語曰。景純有孫。子才無後。宣和中有反語云。寇萊公之知人則哲。王子明之將順其美。包孝肅之飲人以和。王介甫之不言所利。此皆賢者之過。人皆得而見之者也。

祥符中天書旣降。復有道士趙壽國來上靈寶大洞人皇經。稍記其首篇云。爾時玉清虛皇上帝。在玉清

景靈之宮。忽從自明簾內。傳下玉音。清越嘹亮。三十三天。一時耳根共感。是諸天衆。速駕雲車。龍鸞填隘。天路皆滿。諸天既集。面覲虛皇于雲陛之下。劍珮瓊瑋。交映左右。虛皇曰。嗟爾諸天。聽予渙號。夫天有天皇。地有地皇。人有人皇。天得清皇。地得寧皇。惟此林林衆滿。太蒼下方大亂。予閱是痾。爰召宓義。遣茲詔靈。下撫方州。二亥後先命處天門。八方歸王。天下太平。今茲嗣皇。實惟聖神。合壽千春。東封泰山。西封金天。威鎮幽朔。鬼方血腥。云云。其言誕譽不經。皆若此類。朝廷雖知其妄。亦賜金帛。設朝受之。供奉大內。呂夷簡有總髻交王至清。以屢賦不第。隱遯山壑。後以子簿畿縣。薄遊京師。呂折簡召之。不赴。會仁宗詔廢郭后。呂實贊之。至清寓書夷簡曰。僕初與坦夫。讀書山寺。論家人一卦。坦夫獨以孔子反身二字。爲此卦入證語。乃今天子第有取于威如之吉。使天下夫婦之主。不得終始其義。坦夫獨不可以反身之說諫之。而將順至此乎。安在其有證于尼父一言也。僕今知讀書與仕宦。自是兩截事。幸哉。天以布衣終我身也。雖然。坦夫自今永保祿位矣。何者。有所廢必有所愛。能從人主所愛處。有勳力焉。亦必不愛爵祿。以愛其人于衆人之外也。此一牘也。先爲相業。信後爲相位。賀惟坦夫兩受之。夷簡大怒。併其子逐焉。賢士大夫。亦有天理抹煞處。如錢惟演之下石寇萊公是也。凶忍大奸。亦有天理不泯處。如秦檜之不盡殺鄂國子孫是也。

洪駒父才而傲。每讀時輩篇什。大叫云。使人齒頰皆甘。其人喜而問之曰。似何物。駒父曰。不減樹頭霜柿。人每頰面而去。比汴京失守。粘沒喝勾括金銀。駒父以奉命行事。日惟觴酌。幸醉中不見此時情狀。竟爲

綱紀自利。峻于搜索。坐貶沙門。亦大冤也。

余少長大梁。蒙養于保抱之手。卽淮泗之間。近在襟帶。未嘗眼見身到。比一旦崩亂。將母則棄妻。挈妻則擲女。屈身孤蓬之底。乘風渡淮。濁浪掀空。幾葬于寶應魚腹。魂魄盡喪。相顧失色。及至江上。于時海潮上逆。狂濤東瀉。渺迷極望。雖騰價買舟。猶與僧尼雜販。共載一船。母妻悲號。至不欲渡。願投江流。舟發未幾。檣爲風折。半欹浪中。滿船狂叫。人心先覆。幸呼它舟擲纜。得抵潤州。此蓋生平未遭之危。合門未遭之苦也。後嘗問人曰。江必從此渡乎。必當更有狹處。其人亦不知答。旣而司諫吳表臣上疏言。大江之南。上自荆鄂。下至常潤。不過十郡之間。其要不過七渡。上流最急者三。荆南之公安石首。岳之北澤。中流最急者二。鄂之武昌。太平之采石。下流最急者二。建康之宣化。鎮江之瓜洲。此七渡。當擇官兵守之。其餘數十處。或道路迂曲。水陸不便。非大軍往來徑捷之處。于是始知前問之失也。望洋之喻。豈虛也哉。

慶曆三年三月。呂夷簡以司徒歸第。夏竦召至國門而罷。詔以賈昌朝參知政事。杜衍爲樞密使。富弼爲樞密副使。弼固辭。改資政殿學士。乃以范仲淹代弼。又以歐陽修。余靖。蔡襄。王素充諫官。一時朝野懽欣。至酌酒相慶。太學博士石介。因作慶曆聖德頌。其詞太激。邪佞切齒。其頌至范仲淹曰。太后乘勢。湯沸火熱。汝時小臣。危言巖巖。太后一語。仁宗含之在中。不敢出之口者。所不宜言。其最做心目者。如衆賢之進。如茅斯拔。大奸之去。如距斯脫。又曰。神武不殺。其默如淵。聖人不測。其動如天。時韓魏公與范文正公。適自陝來朝。竦之密姻。有令于閱者。手錄此頌。進于二公。且口道竦非爲諸君子慶。二公去閱。范拊股謂韓

曰爲此恠鬼輩壞之也。韓曰：天下事不可如此必壞。孫復聞之亦曰：石守道禍始于此矣。汴中呼餘杭百事繁庶。地上天宮。及余邸寓山中。深谷枯田。林莽塞目。魚蝦屏斷。鮮適莫構。惟野蔥苦蕒。紅米作炊。炊汁許許。代脂供飲。不謂地上天宮有此受享也。

國朝婦人封自執政以上。封夫人。尚書以上。封淑人。侍郎以上。封碩人。太中大夫以上。封令人。中散大夫以上。封恭人。朝奉大夫以上。封宜人。朝奉郎以上。封安人。通直郎以上。封孺人。然夫人有國郡之異。而武臣一準文階。其後三公大將。封帶王爵者。妾亦受封。特視正妻減階耳。若郡縣君。則先曾王大母亦封縣君。正和二年。詔除之。

本朝以童子舉。如國初賈黃中。舉自五代。不論。若太宗朝。洛陽郭忠恕。通九經。七歲舉童子科。淳化二年。賜秦州童子譚孺卿出身。雍熙間。得楊億。年十一。以童子召對。授秘書正字。咸平間。得宋綬。景德間。撫州進士晏殊。年十四。大名府進士姜蓋。年十三。祥符間。又得李淑。又趙煥。以童子召對。令從祕閣讀書。時年十二。蔡伯希。年四歲。誦詩百餘篇。召爲秘書正字。神宗朝。元豐七年。賜饒州童子朱天錫。五經出身。年九歲。賜錢五萬。又天錫從兄天中。年十二。試十經皆通。賜五經出身。紹興七年。賜處州孝童周智出身。乾道淳熙間。呂嗣興。王克勤。賜童子出身。先君子以十歲通九經。以不謁丁晉公。擯不以聞。竟不得與諸君子同聲治朝也。

壽山長嶽。在汴城東北隅。徽宗所築。初名鳳凰山。後改壽山長嶽。周圍十餘里。其最高一峰。九十步。上有

介亭分東西二嶺。直接南山。山之東。有萼綠華堂。家大夫嘗承命作頌曰。玉皇御天。金母嫁女。瑤壁成車。裁瑛作塵。龍馭崑丘。鳥發玄圃。笑月光微。看雲色阻。荷露添華。柳烟生嫵。九重歡眷。六宮遜處。乃構綺房。用當金字。碌碌宜塔。瑟瑟爲戶。碧落深沉。青霞墉堵。小臣獻頌。庶叶萬舞。書館八仙館。紫石岩樓。眞登覽。秀軒龍吟堂。山之南。則壽山兩峰並峙。有雁池。囉囉亭。山之西。有藥寮。西莊。巢雲亭。白龍泝。濯龍峽。蟠秀。練光。跨雲。三亭。羅漢巖。又西有萬松嶺。嶺畔有倚翠樓。上下設兩閣。閣下有平地。鑿大方沼。沼中作兩洲。東爲蘆渚。浮陽亭。西爲梅渚。雪浪亭。西流爲鳳池。西出爲雁池。中分二館。東曰流碧。西曰環山。有巢鳳閣。三秀堂。東池後有揮雪亭。復由磴道上至介亭。亭左有極目亭。蕭森亭。右有雨雪亭。半山北俯景龍江。引江之上流。注山澗。西行爲漱瓊軒。又行石間爲煉丹。凝觀。圓山。三亭。下視江際。見高陽酒肆。及清澌閣。北岸有勝筠菴。躡雲亭。蕭閒閣。飛岑亭。支流別爲山莊。爲回溪。又於南山之外。爲小山。橫亙二里。曰芙蓉城。窮極巧妙。而景龍江外。則諸館舍尤精。山之西北。有老君洞。爲供奉道像之所。其地又因瑤華宮火。取其地作大池。名曲江。中有堂曰蓬壺。東盡封丘門而止。西則是天波門橋。引水直西。殆半里。江乃折南。又折北。折南者。過閭闔門。爲複道。通茂德帝姬宅。折北者。四五里。屬之龍德宮。旣成。帝自爲良嶽記。以爲山在國之良位。故名良嶽。嶽之正門。名曰陽華。故亦號陽華宮。宣和五年。朱勗于太湖。取石高廣數丈。載以大舟。挽以十夫。鑿河斷橋。毀堰拆廂。數月乃至。會初得燕山之地。因賜號敷慶神運石。石傍植兩檜。一天矯者。名朝日升龍之檜。一偃蹇者。名臥雲伏龍之檜。皆玉牌金字書之。徽宗御題云。拔翠琪樹林。雙檜植靈

圉上稍蟠木枝。下拂龍髯茂。撐擎天半分。連卷虹南負。爲棟復爲梁。夾輔我皇構。嗟乎。檜以和議作。相不能恢復中原。已兆于半分南負。而一結更是高廟御名。要皆天定也。巖曰。玉京獨秀太平岩。峰曰。慶雲萬態奇峰。又作絳霄樓。直山北勢極高峻。竄出雲表。蓋工藝之巧。其後羣閣興築不已。四方花竹奇石。悉萃于斯。珍禽異獸。無不畢集。命市人薛翁。蒙擾馴狎。駕至迎立。鞭扇間名萬歲山珍禽。命局曰來儀。所及金芝產于良嶽萬壽峰。只改名壽嶽。

先三老碑在扶溝石牛廟。後徙墓下。碑橫裂爲二。上復破泐如圭。然光瑩可鑒。少嘗從祖父詣碑拜讀。至斬賊公先勇食邑遺鄉六百戶事。考之東漢先人列傳。了不可得。後從駕南渡。得歐陽公集古錄。第釋序世次及缺文而已。最後得趙明誠金石錄。始知公先勇爲公孫勇。又不知出自何書。今耄矣。目不能觀書。徒悒悒此事未了。忽從字文學博處。得鄱陽洪景伯碑跋。方知此事在范書田廣明傳。傳云。故城父令公孫勇謀反。衣繡衣。乘駟馬車至圍。圍使小史侍之。知其非是。守尉魏不害等共收捕之。上封四人爲侯。小史竊言。上問之。對曰。爲侯者得東歸否。上曰。汝鄉名爲何。對曰。名遺鄉。上曰。用遺汝矣。于是賜小史爵關內侯。食邑遺鄉六百戶。不覺快躍而起。簪冠墮地。老髮躑躑。弗暇手握也。家世讀書。碑碣尙在。至一千年。不知碑石上事。媿已媿已。

余嘗見內庫書金樓子。有李後主手題曰。梁孝元謂王仲宣昔在荊州。著書數十篇。荊州壞。盡焚其書。今在者一篇。知名之士咸重之。見虎一毛。不知其斑。後西魏破江陵。帝亦盡焚其書。曰。文武之道。盡今夜矣。

何荊州壞焚書二語。先後一轍也。詩以慨之曰。牙籤萬軸。綵紅綃。王粲書同付火燒。不是祖龍留面目。遺篇那得到今朝。書卷皆薛濤紙所抄。惟今朝字誤作金朝。徽廟惡之。以筆抹去。後書竟如識入金也。丁謂傾意以媚萊公。冀得大拜。然事未可必。生平最尙祿祥。每晨占鳴鵲。夜看燈蕊。雖出門歸邸。亦必竊聽人語。用卜吉兆。時有無賴子慶貧寒不振。計且必死凍餓。謀于一落第老儒。老儒曰。汝欲自振。必易姓名。當大濟耳。幸無忘我。慶拜而聽之。老儒遂改于爲丁。易名宜祿。使投身于謂。謂大喜收之。門下皆怪聞之。謂不答。第曰。吾得此人。大拜必矣。不旬月而謂果入相。此人遂以寵冠紀綱。雖大僚節使。無弗倚藉。闕說不踰年而宜祿家十萬矣。老儒亦以引見。竟得教授大郡。至今相傳。不解所謂。頃偶讀沈約宋書曰。宰相蒼頭呼爲宜祿。且復姓丁。愈愜所念。莫謂晉公眼不讀書也。

道君皇帝。以于闐玉。益八寶爲九寶。其文云。範圍天地。幽贊神明。保合太和。萬壽無疆。王初察草詔曰。太極函三。運神功于八索。乾元用九。增寶曆于萬年。八索用九。可謂切事。徽廟以銀碗盛蘇合香賜之。司馬溫公保身說云。天下有道。君子揚于王庭。以正小人之罪。而莫敢不服。天下無道。君子括囊不言。以避小人之禍。而猶或不免。倘人生昏亂之世。不在其位。四海橫流。而欲以口舌救之。臧否人物。激濁揚清。擦蛇虺之頭。踐虎狼之尾。以至身被淫刑。禍及朋友。士類殲滅。而國隨以亡。不一悲乎。夫惟郭泰。旣明且哲。以保其身。申屠蟠。見機而作。不俟終日。卓乎其不可及也。先君書此。以置座右。蓋自鑑其生平所遭耳。吳趙諸公。惜不早見及此。遂陷秦氏酷禍。悲哉。

杭州江隄。築自梁開平四年八月。時錢氏始伯。武肅王以候潮。通江二門之外。潮水衝齧。版築不就。命強弩數百射之。潮水爲避。擊西陵。遂以竹籠石。植大木圍之。率數歲輒復壞。祥符七年。潮直抵郡城。守臣戚綸。漕臣陳堯佐。議累木爲岸。實薪土以捍之。或言非便。命發運使李溥按視。十月壬戌。溥請如錢氏舊制。立木積石以捍潮波。從之。其後踰年。隄不成。卒用薪土。天聖四年二月辛酉。侍御史方謹言。請修江岸。二斗門。慶曆六年。漕臣杜杞。築錢塘隄。起官浦。至沙陘。以捍風濤。浙江石塘。剏于錢氏。景祐中。工部郎中張夏。爲轉運使。置捍江兵。採石修塘。人爲立祠。紹興二十年。修石隄。二十二年十一月二十五日。吏部尙書林大甬言。潮爲吳患。其來已久。捍禦之策。見于浙江亭碑。自江流失道。潮與洲門。怒號激烈。千霆萬鼓。民以不寧。宜顯置一司。究利病而後興工。乾道七年十一月十八日。帥臣沈夔修石隄成。增石塘九十四丈。武肅王還臨安。與父老飲。有三節還鄉之歌。父老多不解。王乃高揭吳音以歌曰。你輩見儂底歡喜。別是一般滋味子。長在我儂心子裏。至今狂童游女。借爲奔期間答之歌。呼其宴處爲歡喜地。

汴京故宮。躡雲蔽日。常在夢寐。稍能記憶。條載于此。宮城本五代周舊都。宋因之。建隆三年。廣皇城東北隅。命有司畫洛陽宮殿。按圖修之。周圍五里。南三門。中曰乾元。東曰左掖。西曰右掖。東西面門。曰東華。西華。北一門。曰拱辰。乾元門內。正南門。曰大慶。東西橫門。曰左右升龍。左右北門內各一門。曰左右銀臺。東華門內一門。曰左承天。祥符西華門內一門。曰右承天。左承天門內道。北門曰宣祐。正南門內。正殿曰大慶。東西門曰左右太和。正衙殿曰文德。兩掖門曰東西上閣。東西門曰左右嘉福。大慶殿北有紫宸殿。視

朝之前殿也。西有垂拱殿。常日視朝之所也。次西有皇儀殿。又次西有集英殿。宴殿也。殿後有需雲殿。東有升平樓。宮中觀宴之所也。宮後有崇政殿。閱事之所也。殿後有景福殿。殿西有殿北向。曰延和。便坐殿。凡殿有門者。皆隨殿名。宮中有延慶。安福。觀文。清景。慶雲。玉京等殿。壽寧堂。延春閣。福寧殿。東西有門。曰左右昭慶。觀文殿西門曰延真。其東真君殿。積慶前。建威真閣。又有龍圖閣。下有資政。崇和。宣德。述古四殿。天章閣下有羣玉。藝珠二殿。有寶文閣。閣東西有嘉德。延康二殿。前有景輝門。後苑東門曰寧陽。苑內有崇聖殿。太清樓。其西又有宣聖。化成。金華。西涼。清心等殿。翔鸞儀鳳二閣。華景。翠芳。瑤津。三延。延福宮有穆清殿。延慶殿北有柔儀殿。崇徽殿北有欽明殿。延福宮北有廣聖宮。內有太清。玉清。沖和。集福。會祥五殿。建統。盃殿于後苑。又有慈德殿。觀稼殿。延曦閣。邇英殿。隆儒閣。慈壽殿。慶壽宮。保慈宮。玉華殿。基春殿。睿思殿。承極殿。崇慶。隆祐二宮。睿成宮。宣和殿。聖瑞宮。顯謨閣。玉虛殿。玉華閣。親鸞宮。燕寧殿。延福宮。致和三年春。作新宮。始南向。殿因宮名曰延福。次曰蕊珠。有亭曰碧琅玕。其東門曰晨暉。其西門曰麗澤。宮左復列二位。其殿有穆清。成平。會寧。睿謨。凝和。崑玉。羣玉。其東閣則有薰醞。報瓊。蟠桃。春錦。疊瓊。芬芳。麗玉。寒香。拂雲。假蓋。翠葆。鉛英。雲錦。蘭薰。摘金。其西閣有繁英。雪香。披芳。鉛華。瓊華。文綺。絳蕝。穠華。綠綺。瑤碧。清陰。秋香。叢玉。扶玉。絳雲。會寧之北。巖石爲山。山上有殿曰翠微。旁爲二亭曰雲歸。曰層巖。凝和之次。閣曰明春。其高踰一百一十尺。閣之側爲殿二。曰玉英。曰玉潤。其帶附城築土植杏。名杏岡。覆茅爲亭。修竹萬竿。引流其下。宮之右爲位二。閣曰晏春。廣十有二丈。舞臺四列。山亭三峙。鑿圓池爲海。跨海爲亭。

架石梁以升山。亭曰飛華。橫度之四百尺。有畸縱數之二百六十有七尺。又流泉爲湖。湖中作隄。以接亭。隄中作梁以通湖。梁之上又爲茅亭。鶴莊。鹿舄。孔翠。諸柀。蹄尾動數千。嘉花名木。類聚區別。幽勝宛若生成。西抵麗澤。不類塵境。其東直景龍門。西抵天波門。宮東西二橫門。皆視禁門法。所謂晨暉麗澤者也。而晨暉門出入最多。其後又跨舊城修築。號延福第六位。跨城之外。浚壕深者水三尺。東景龍門橋。西天波門橋。二橋之下。疊石爲固。引舟相通。而橋上人物。外自通行不覺也。名曰景龍江。其後又關之。東過景龍門。至封丘門。此特大概耳。其雄勝不能盡也。

余汴城故居。近陳州門內。蔡河東畔。居後有圃。喬林深竹。映帶城隅。中有來鶴亭。王大父時。有野鶴來棲。遂馴狎不去。蘇子瞻有詩云。鴻漸偏宜丹鳳南。冠霞披月羽毵毵。酒酣亭上來看舞。有客新名喚作耽。每誦此詩。未嘗不淚滿青衫也。

子瞻又有與王大父手墨一紙云。累日欲上謁。竟未暇辱教。承足疾未平。不勝馳繫。足疾惟葳靈仙。牛膝二味爲末。蜜丸。空心服。必効之藥也。但葳靈仙艱得真者。俗醫所用。多糞本之細者爾。其驗以味極苦。而色紫黑。如胡黃連狀。且脆而不韌。折之有細塵起。向明示之。斷處有黑白暈。俗謂之有鴿鴿眼。此數者備。然後爲真。服之有奇驗。腫痛拘攣皆可已。久乃有走及奔馬之効。二物當等分。或視臟氣虛實。酌飲牛膝酒及熱水皆可下。獨忌茶耳。犯之不復有効。若常服此。卽每歲收槐阜莢芽之極嫩者。如造草茶法貯之。以代茗飲。此効屢嘗目擊。知君疾苦。故詳以奉白。元素書已作。稍暇詣見。軾白彥方足下。王大父有未疾。

故以此方見示。此紙尙存篋中。渡江已來。與妻擊共寶者。

徽廟嘗乘驄馬。至太和宮前。忽宜平日所愛小人。其馬至御前。馬不肯進。左右鞭之。益鳴跳。不如調訓時。圉人進曰。此願封官耳。上曰。猴子且官供奉。況使小烏白身邪。勅賜龍驤將軍。然後帖然就轡。

荆公柄國時。有人題相國寺壁云。終歲荒蕪湖浦焦。貧女戴笠落柘條。阿儂去家京洛遙。驚心寇盜來攻剽。人皆以爲夫出婦憂荒亂也。及荆公罷相。子瞻召還。諸公飲蘇寺中。以此詩問之。蘇曰。于貧女句。可以得其人矣。終歲十二月也。十二月爲青字。荒蕪田有草也。草田爲苗字。湖浦焦。水去也。水旁去爲法字。女戴笠爲安字。柘落木條剩石字。阿儂是吳言。合吳言爲誤字。去家京洛爲國。寇盜爲賊民。蓋言青苗法。安石誤國賊民也。

家大夫嘗謂曾子固南齊書序。是一部十七史序。不可不熟看其要處。云所謂良史者。其明必足以周萬事之理。道必足以適天下之用。智必足以通難知之意。文必足以發難顯之情。然後其任可得而稱也。昔者唐虞有神明之性。有微妙之德。使由之者不能不知。知之者不能名。其言至約。其體至備。而爲之二典者。推而明之。所記者。豈獨其迹。併與其深微之意。而傳之無不盡也。至于後世諸史。事迹曖昧。雖有隨世以就功名之君。相與合謀之臣。未有得赫然傾動天下之耳目。而一時儉奪悖理之人。亦幸而不暴著于世。豈非所託不得其人故邪。第其中反覆照應處。多累句重疊。爲可惜耳。

汴京河渠凡四。曰蔡河。自陳蔡由西南戴樓門入京城。繚繞向東南陳州門出。曰汴河。自西京洛口分水。

從東水門入京城。繞州橋御路水西門出。曰五丈河。表自濟鄆。自新曹門入通汴河。曰金水河。自京城西南分京索河築隄。從汴河上用木槽架過。從西北水門入京城夾牆。遮擁入大內。灌後苑池浦。先是詔析金水河透槽。回水入汴。北引洛水入禁中。賜名天源河。然舟至卽啓槽。頻妨行舟。乃自城西超字坊。引洛由咸豐門立隄。凡三千三十步。水遂入禁而槽廢。

吳越忠懿王。以天成四年八月二十四日四鼓生。以端拱元年八月二十四日四鼓薨。年政六十。是夕大流星墜于正殿之上。光燭滿庭。

羅昭諫投身武肅。特加殊遇。復命簡書辟之曰。仲宣遠託婁荊州。都緣亂世。夫子辟爲魯司寇。只爲故鄉。以劉爲冀。遊武肅嫌名也。

余邸寓于錢氏之舊鄉。蒼山碧樹。想見衣錦風煙。因念余昔家京邑。每過南宮城太學左方禮賢宅。未嘗不欽仰忠懿之賢。雖喬木垂楊。朱門雕砌。宛若猶在。于時子姓貧寒。至有衣食不周者。嘗讀兩朝供奉錄。太祖太宗。雖所賜金器。六萬四千七百餘兩。銀器四十萬八千八百餘兩。玉石器皿。二萬七千事。寶玉帶四十二條。錦綺一十六萬六千三百餘疋。然忠懿入貢。如赭黃犀。龍。鳳。龜。魚。仙人。鰲山。寶樹等。通犀帶凡七十餘條。皆希世之寶也。玉帶二十四。紫金獅子帶一。金九萬五千餘兩。銀一百一十萬二千餘兩。錦綺二十八萬餘疋。色絹七十九萬七十餘疋。金飾玳瑁器。一千五百餘事。水晶瑪瑙玉器。凡四千餘事。珊瑚十萬三尺五寸。金銀飾陶器。一千四萬餘事。金銀飾龍鳳船舫二百艘。銀粧器械七十萬事。白龍腦二百

餘斤及歸國之初舉朝文武閣寺皆有餽遺蓋有國已來所積一空矣。

陳眉公訂正楓窗小牘卷之下

舊京工伎固多奇妙。卽烹煮燂案亦復擅名。如玉樓梅花包子。曹婆肉餅。薛家羊飯。梅家鵝鴨。曹家從食。徐家瓠羹。鄭家油餅。王家乳酪。段家爐物。石逢巴子。南食之類。皆聲稱于時。若南遷湖上。魚羹。宋五嫂。羊肉。李七兒。奶房王家。血肚羹。宋小巴之類。皆當行不數者。宋五嫂。余家蒼頭嫂也。每過湖上。時進肆慰談。亦它鄉寒故也。悲夫。

比部郎洪湛。以王欽若賄賣任懿及第累謫儋州。竟死海外。忽有相識。遇洪大庾嶺。猶儀衛赫然。若有官者。相識謂是赦還。與執手慶慰。洪曰。我往捕王欽若耳。言訖不見。其人愕然。已而欽若病甚。口呼洪卿寬我。我以千金累卿。然惠秦已囊百兩。不難償卿。九百也。觀此則二百五十金之說。猶當時鞠者嘿爲欽若減貫也。然湛冤極矣。

名畫李成。以山水供奉禁中。然以子姓饒貲。爲宮市珠玉大商。不易爲人落筆。惟性嗜香藥名酒。人亦不知。獨相國寺東宋藥家。最與相善。每往醉必累日。不特楮素揮灑盈滿箱篋。卽舖門兩壁亦爲淋漓潑染。識者謂壁畫最入神妙。惜在白堊上耳。

思陵神輿就祖道祭。陳設窮極工巧。百官奠哭。紙錢差小。官家不喜。諫官以爲俗用紙錢。乃釋氏使人以過度其親者。恐非聖主所宜。以奉賓天也。今上抵于地曰。邵堯夫何如人。而祭先亦用紙錢。豈生人處世。

如汝能日不用一錢否乎。

岳少保既死獄。藉其家。僅金玉犀帶數條。及鎖鑿兜鍪。南蠻銅弩。鑲刀弓劍鞍轡。布絹三千餘疋。粟麥五千餘斛。錢十餘萬。書籍數千卷而已。視同時諸將。如某某輩。莫不寶玩滿堂。寢田園。佔畿縣。享樂壽考。妻兒滿前。禍福頓懸。不意如此。天道亦自有不可知者。

本朝曆凡十變。在建隆則曰應天。在太平興國則曰乾元。在咸平則曰儀天。在天聖曰崇天。在治平曰明天。在熙寧曰奉天。在元祐曰觀天。在崇寧曰占天。未幾又改曰紀元。在紹興曰統元。

真宗時。賈昌朝撰國朝時令。初景祐中。丁度等承詔。約唐時令。爲國朝時令。以備宣讀。最後昌朝又參以蔡邕、高誘、李林甫諸家月令之說。爲集時刻。安靖撰時鏡。所書以四時分十二月。各繫其事。孫岳撰備用時令。見賈昌朝所奏時令。見夫紹興中。雖訪得之。非復舊本。乃以景祐曆書者。日月之合。疏列分度。併取一二名數。注字音于下。以備閱時之宜焉。

余少從家大夫觀金明池水戰。見船舫迴旋。戈甲照耀。爲之目動心駭。比見錢塘水軍。戈船飛虎。迎弄江濤。出沒聚散。欻忽如神。令人汗下。以爲金明池事。政如兒戲耳。至如韓蘄王困虜王天蕩。飛輪八檝。蹈軍。繫回江而者。更不知何如也。

熙寧元年十月。詔頒河北諸軍教閱法。凡弓分三等。九斗爲第一。八斗爲第二。七斗爲第三。弩分三等。二石七斗爲第一。二石四斗爲第二。二石一斗爲第三。

余始寓京邸。于紹興二年五月大火。僅挈母妻出避湖上。此時被燬者一萬三千餘家。及家山中六年十二月。京師復火。更一萬餘家。人皆以爲中興之始。改元建炎。致此。然周顯德五年夏四月辛酉。城南火作。延于內城。忠懿王避居都城驛。詰旦且焚鎮國倉。王泣禱而滅。計一萬九千餘家。但臨安撲救。視汴都爲疎。東京每坊三百步有軍巡舖。又于高處有望火樓。上有人探望。下屯軍百人。及水桶。洒箒。鈎鋸。斧杈。梯索之類。每遇生發。撲救須臾便滅。

高廟在建康。有大赤鸚武自江北來。集行在承塵上。口呼萬歲。宦者以手承之。鼓翅而下。足有小金牌。有宣和二字。因以索架置之。稍不驚怪。比上膳。以行在草草無樂。鸚鵡大呼。卜尙樂起。方響久之曰。卜娘子不敬萬歲。蓋道君時。掌樂宮人。以方響引樂者。故猶以舊格相呼。高廟爲罷膳。泣下。後此鳥持至臨安。忽死。高宗親爲文祭之。云。金鉅絳裳。何意朱紫。乘軒駭散。纏羅鬪死。不遠長江。來自汴水。匪飢則附。曰。忠自矢。謝跡雲端。投身禁裏。每呼舊人。以勵近侍。禽言若斯。烏官誰似。云。胡委羽。歸魂鶉尾。借號有烏。來朝無雉。漸肯爲儀。曆仍輝紀。尙饗宸翰。灑灑一時大手。當爲置筆。

眞宗皇帝祀汾而還。駕過伊闕。親洒宸翰。爲銘勒石。文不加點。羣臣皆呼萬歲。其文曰。夫結而爲山。融而爲谷。設險阻于地理。資守距于國都。足以表坤載之無疆。示神州之大壯者也。矧復洪源南導。高岸中分。夏禹濬川。初通闕塞。周成相宅。肇建王城。風雨所交。形勢斯在。靈葩珍木。接畛而揚芬。盤石檻泉。奔流而激響。寶塔千尺。蒼崖萬尋。祕等覺之眞身。刻大雄之尊像。豈獨勝遊之是屬。故亦景貺之潛符。躬荐兩圭。

祝汾陰而祈民福。言旋六轡。臨雒宅而觀土風。既周覽于名區。乃刊文于真□。銘曰。高闕巍峩。羣山迤邐。乃固王域。是通伊水。形勝居多。英靈萃止。螺髻偏摩。鴈塔高峙。奠玉河濱。回輿山趾。鳴蹕再臨。貞珉斯紀。國朝開獻書之路。祥符中獻書者十九人。賜出身。得書萬七百五十四卷。宣和五年。三館參校。榮州助教張頤所進書二百二十三卷。李東一百六十二卷。皆係闕逸。乞加褒賞。頤賜進士出身。東補迪功郎。七年。取索到王闌、張宿等家藏書。以三館祕閣書目比對所無者。凡六百五十八部。二千四百一十七卷。闌補承務郎。宿補迪功郎。

余從祖姑壻陳從易。得與太清樓校勘。天聖三年六月。陳以十代興亡論。妄加塗竄。同官皆降一職。崇寧二年五月。祕閣書寫成二千八十二部。未寫者一千二百十三部。及闕卷二百八十九。立程限繕錄。政和七年十一月十四日戊戌。校書郎孫觀奏。四庫書尙循崇文舊目。頃訪求遺書。總目之外。凡數百家。幾萬餘卷。請讓次增入總目。合爲一卷。詔觀等讓次。名曰祕書總目。及汴京不守。悉爲金虜竄去。車駕渡江。詔搜江浙閩粵載籍。四庫至四萬四千四百八十六卷。較崇文舊目多一萬三千八百十七卷。又忠陵以萬機之暇。御書六經論語史記列傳。刊石立於太學。典籍之盛。無媿先朝。第奇祕闕逸。較前少損。所增多近代編述耳。

余向從汴中。得見錢武肅王鐵券。其文曰。維乾寧四年歲次丁巳八月甲辰朔四日丁未。皇帝若曰。咨爾鎮海鎮東等軍節度。浙江東西等道觀察處置營田招討等使。兼兩浙鹽鐵制置發運等使。開府儀同三

可。檢校太尉兼中書令持節潤越等州刺史。上柱國彭城郡王。食邑五千戶。寔封一百戶。錢鏐。朕聞銘。鄧
隲之勳。言垂漢典。載孔悝之德。事美魯經。則知褒德策勳。古今一致。頃者董昌僭僞。爲昏鏡水。狂謀惡迹。
漸染齊人。爾能披攘兇渠。邊定江表。忠以衛社稷。惠以福生靈。其機也。氛稜清。其化也。疲羸泰。拯永粵于
塗炭之上。師無私焉。保餘杭于金湯之固。政有經矣。志獎王室。績冠侯藩。溢于旂常。流在丹素。雖鍾繇刊
五熟之釜。竇憲勒燕然之山。未足顯功。抑有異數。是用錫其金板。申以誓詞。長河有似帶之期。秦華有如
拳之日。惟我念功之旨。永將延祚子孫。使卿長襲寵榮。克保富貴。卿恕九死。子孫三死。或犯常刑。有司不
得加責。承我信誓。往惟欽哉。宜付史館。頒示天下。賫券中使。則焦楚鎡也。

歐陽文忠公樊侯廟災記。真稿舊存余家。其中改竄數處。如立軍功三字。稿但曰起家。平生曰生平。振目
曰瞋目。勇力曰威武。雄武曰英勇。生能萬人敵。死不能庇一躬。曰生能響。啞吡吡之主。死不能保束草
附土之形。有司曰殘暴。後啞嗚吡吡四字無。第曰使風馳電擊。憑此咆哮。凡定二十三字。書亦逾勁。時余
家從祖倅鄭。故得其稿。今竟失去。不得與蘇公手書並存。惜哉。

紹興九年十月二十一日。詔皇太后宮殿名慈寧。三十日畢功。羣臣上表云。臣等言。德之大者。必盡萬物
之報。以稱其禮。孝之至者。必得四表之心。以寧其親。天祚文武之隆。世基任姒之德。仰模太紫。前考異宮。
宜昭揭于鴻名。以答揚于流澤。臣中賀竊以來。朝置衛。遠存長樂之鴻名。中禁承顏。近著寶慈之茂實。皆
以體王居于宸極。據寶執于坤靈。廣一人欽愛之風。極萬世尊崇之奉。載新令典。允屬聖時。伏惟皇帝。達

孝通于神明。要道形于德教。紹復大業。對越祖宗在天之靈。抑畏小心。躬蹈帝王高世之行人。與能而樂戴。天復命以中興。上推履武之祥。丕啓生商之慶。方且致天下之養。用寅奉于母儀。成路寢之威。示日嚴于子道。臣等率籲衆志。懇款一詞。爰藉合于前章。極崇施于顯號。叶情文而並舉。煥典冊以增華。輦道中通。朝夕燕兩宮之奉。珮環入覲。時節奉萬年之觴。示垂裕于無疆。益儲休於有美。伏請建皇太后宮殿。以慈寧爲名。時顯仁太后。尙羈虜庭。讀此真堪爲高廟泣下也。

雞冠花。汗中謂之洗手花。中元節則兒童唱賣。以供祖先。今來山中。此花滿庭。有高及丈餘者。每遙念墳墓。涕淚漣然。乃知杜少陵感時花濺淚。非虛語也。

頃從臨安。得見石晉授文穆王玉冊文曰。惟天福八年歲次癸卯。十月丙午朔六日辛亥。皇帝若曰。在天成象。拱辰分將相之星。惟帝念功。啓土列侯王之國。朕所以法昊穹而光宅。稽典禮以疏封。而況世著大勳。時推令器。探寶符而嗣位。仗金鉞以宣威。羽翼大朝。藩籬東夏。宜列諸侯之上。特隆一字之封。簡自朕心。叶于輿論。咨爾保邦宣化。忠正翊戴功臣。起復鎮國大將軍。右金吾衛上將軍。員外置同正員。檢校太師。兼中書令。杭州越州大都督。充鎮海鎮東等軍節度。浙江東西等道管內觀察處置。兼兩浙鹽鐵制置。發運營田等使。上柱國。吳越國王。食邑一萬七千戶。寔封四千戶。錢佐爲時之瑞。命世而生。負經文緯武之才。蘊開物成務之志。英華發外。精義入神。亞夫繼社稷之勳。顧榮擅東南之美。眷言祖考。志奉國朝。清吳越之士疆。執桓文之弓矢。天資厥德。代有其人。荷基搆以克家事。梯航而述職。殊庸斯在。信史有光是

舉彝章。爰行盛典。土茅符節。方推翼世之資。黻冕輅車。更重榮勳之禮。斯爲異數。允屬眞王。今遣光祿大夫。檢校司徒。行太子賓客。上柱國。太原縣開國男。食邑三百戶。王玟。使副正議大夫。行尙書吏部郎中。柱國。賜紫金魚袋。趙熙等。持節備禮冊。爾爲吳越國王。於戲。周寵元臣。四履錫命。漢封異姓。八國始王。指河岳以誓功。俾子孫而襲爵。爾纂服舊業。朕考前文。勿忘必復之言。更廣無窮之祚。懋昭前烈。爾惟欽哉。余家藏春秋繁露。中缺兩紙。比從藏書家借對。缺紙皆然。卽館閣訂本。亦復爾爾。不知當時校勘。受賞銀絹者。得無媿乎。後從相國寺資聖門。買得抄本。兩紙俱全。此時歡喜。如得重寶。架囊似爲生氣。及離亂南來。缺本且不可得矣。

東坡歐公集序云。宋興七十餘年。民不知兵。富而教之。至天聖景祐極矣。而斯文終有媿于古。士亦因陋守舊。論卑而氣弱。自歐陽子出。天下爭自濯磨。以通經學古爲高。以救時行道爲賢。以犯顏納諫爲忠。長育成就。至嘉祐末。號稱多士。歐陽子之功爲多。劉隋司馬溫公文集序云。是文也。君天下者得之。足以鑒興衰。通治體。公卿大夫得之。足以爲忠嘉。盡臣節。士庶人得之。足以檢身厲行。爲君子之歸。以至山顛水涯。幽人放客得之。則浩歌流詠。斟酌厭飫。隨取隨足。兩公之文。眞不媿蘇劉序言也。

國朝自建隆至靖康。自建炎至乾道。大赦凡一百二十有三。恩洽率土。可謂至矣。嘗讀神宗卽位大赦詔曰。夫赦令國之大恩。所以蕩滌瑕穢。納于自新之地。是以聖王重焉。中外臣僚。多以赦前事。搢撻吏民。興起訟獄。苟有註誤。咸不自安。甚非持心近厚之誼。使吾號令不信于天下。其曰。詔內外言事按察司。毋得

依前舉劾。且按取旨。否則科違制之罪。知諫院司馬光上言。切惟御史之職。本以繩按百辟。糾撻姦邪之狀。固非一日所爲。國家素尙寬仁。數下赦令。或一歲之間。至于再三。若赦前之事。皆不得言。則其可言者無幾矣。萬一有姦邪之臣。朝廷不知。誤加進用。御史欲言。則違今日之詔。若其不言。則陛下何從知之。臣恐因此言者。得以箝口偷安。姦邪得以放心不懼。此乃人臣之至幸。非國家之長利也。請追改前詔。刊去言事兩字。帝命光送詔于中書。

周顯德中。嘗詔王朴。考正雅樂。朴以爲十二律管互吹。難得其真。乃依京房爲律準。以九尺之弦十三。依管長斷分寸設柱。用七聲爲均。樂乃和。至景祐元年九月。帝御觀文殿。詔取王朴律準觀視。御筆篆寫律準字於其底。復付太常祕藏本寺。模勒刻石于廳事。博士直史館宋祁爲之贊。其詞曰。有周有臣。嗣古成器。絃寫琯音。柱分律位。俾授攸司。謹傳來世。上聖稽古。規庭閱視。嘉御正聲。親銘寶字。奎鈞奮芒。河龍獻勢。樂府增榮。乾華俯賚。用協咸韶。永和天地。

元祐六年七月朔。皇帝既視文德朝。翰林學士拜疏於庭曰。陛下卽位。尊有德。親有道。詔舉賢良。方正經明。行修藝文之士。欲以幸教天下。甚惠。夫太學者。教化之原也。且先皇帝初斥三學舍。增弟子至三千員。惟聖上幸照臨其宮。上以問丞相。丞相曰。學士議是。今歲屢豐。賀海內誠無事。而陛下聰明仁孝。好學出天性。不因是以風動四方。則事尙何可爲者。況祖宗之舊章。皆在可考。請下有司。討論以進。制曰。可以。歲十月庚午。駕自景靈宮移伏謁孔子祠。入門降輦。步就小次。由東階以升。奠爵再拜。禮官告禮成。然後退。

幸太學。詔博士皆升堂。坐諸生兩廡下。乃命國子祭酒講書之無逸終篇。因而幸武成王廟。而過左丞相。寔從。於是率諸公賦詩以形容之。在位者皆屬和。十二月。詩至太學。祭酒司業全其僚屬以謀之。曰。此太平希闕盛事也。太學何敢私有。必刻金石以傳之天下爲稱。且屬格非序其本末。格非竊惟成周之隆。其人君起居動作之美。載于詩聲于樂者。多出于左右輔弼之臣。而王之德意志慮。至設官而傳道之。不爲區區也。今丞相諸公賦詩。與雅頌之作無異。祭酒欲傳之天下。與道王之德意無異。宜刻石不疑。元祐七年正月。丁酉。謹序。此李公格非筆也。諸公詩皆七言。以章庠行王堂爲韻。賦詩諸公。爲呂公大防、蘇公頌、韓公忠彥、蘇公轍、馮公京、王公巖叟、范公百祿、梁公燾、劉公奉世、顧公臨、李公之純、孫公升、馬公默、范公純禮、王公欽臣、孔公武仲、陳公軒、吳公安持、豐公稷、趙公挺之、李公師德、李公階、王公誼、許公彥、孫公諤、蔡公肇、周公知默、傅公楫、宋公彬、周、宋公商、吳公師仁、張公敦義、劉公符、陳公祥通、鄧公忠臣、李公格非。凡三十六人。

東坡謂食河魴。值得一死。余過平江。姻家張諫院。言南來無它快事。祇學得手煮河魴耳。須臾烹煮。對余方且共食。忽有客見顧。俱起延款。爲猫翻盆。犬復佐食。頃之猫犬皆死。幸矣哉。奪兩人于猫犬之口也。乃泔中食店。以假河魴餉人。以今念之。亦足半死。

余家所藏燕丹子一序甚奇。附載于此。目無秦技無人。然後可學燕丹子。有言不信。有劍不神。不可不讀。燕丹子從太虛置恩怨。以名教衛意氣。便可焚却燕丹子。此荆軻事也。有燕丹而後有荆軻也。秦威太赫。

燕怨太激。威怨相刺。所爲白虹貫日。和歌變徵。我固知其事之不成。倚柱一笑。所謂報太子而成其爲荆卿者乎。余本孱夫。不能學。亦不須讀。第不忍付之宵燭。而錄之以副子家卷軸。惜無作者姓名耳。

靖康已前。汴中家戶門神。多番樣戴虎頭盔。而王公之門。至以渾金飾之。識者謂虎頭男子。是虜字。金飾更是金虜在門也。不三數年。而家戶被虜。王公被其酷尤甚。

政和四年。汝蔡有司上言。連山巖石。往往探擊。多變瑪瑙。地不愛寶。聖瑞非常。乞下詔封禁。以供御用。時遣中使出採。粗者以供屏牖。縹嵌而晶瑩成形。巧絕天工者。蓋充滿內府矣。然此亦靖康預徵也。山者以譬國家磐石之安。變爲瑪瑙者。馬爲南方火宿。國家以火德應之。瑙者惱也。變磐石之安。爲火德憂惱也。宣和三年二月。新鄭門官夫洵溝。從助產朱婆婆。牆外溝底。得一銅器如壺。兩旁有環。腹上有線。其色翡翠。間之以綠。其文曰。綏和元年。供三昌爲湯宜造。三十鍊銅黃塗。壺容二斗。重十二斤八兩。塗工乳護。級椽臨主守。右丞同守令寶省。第重六斤耳。漢權雖減。不宜如許。權知開封府王革。上之內府。

花石綱百卉臻集。廣中美人蕉。大都不能過霜節。惟鄭皇后宅中。鮮茂倍常。盆盎溢坐。不獨過冬。更能作花。此亦后隨北駕。美人憔悴之應也。

先正有洛陽名園記。汴中園囿。亦以名勝當時。聊記於此。州南則玉津園。西去一丈佛園。子王太尉園。景初園。陳州門外園館最多。著稱者。奉靈園。靈嬉園。州東宋門外。麥家園。虹橋王家園。州北李駙馬園。西鄭門外下松園。王太宰園。蔡太師園。西水門外。養種園。州西北有庶人園。城內有芳林園。同樂園。馬季良園。

其它不以名著。約百十不能悉記也。

王荊公字說序云。文者奇耦剛柔。雜比以相承。如天地之文。故謂之文字者。始於一二。而生於無窮。如母之字子。故謂之字。其聲之抑揚開塞。合散出入。其形之衝從曲直。邪正上下。內外左右。皆有義。皆出於自然。非人私知所能爲也。其言甚佳。奈字說多出私智何耳。

程泰之演繁露云。唐人婚禮多用百子帳。特貴其名與婚宜。而其制度。則非有子孫衆多之義。蓋其制本出戎虜。特穹廬拂廬之具體而微者耳。椀柳爲圈。以相連鎖。百張百圍。爲其圈之多也。故以百子名之。亦非其有百圈也。其弛張旣成。大抵如今尖頂圓亭子。而用青氈。通冒四隅上下。便于移置耳。若今禁中大婚百子帳。則以錦繡織成百小兒嬉戲狀。非若程說矣。

太宗興國五年。涇州言定縣婦人怒夫前妻之子婦。斷其喉而殺之。下詔曰。刑憲之設。蓋厚于人倫。孝慈所生。實由乎天性。矧乃嫡繼之際。固有愛憎之殊。法貴原心。理難共貫。自今繼母殺傷夫前妻之子。及姑殺婦者。並以凡人論。慶曆間。寧州童子年九歲。毆殺人。當棄市。帝以童孺爭鬪。無殺心。止命罰金入死者家。開封民聚童子教之。有因夏楚死者。爲其父母所訟。府上具獄。當抵死。宰相以爲可矜。帝曰。情雖可矜。法亦難屈。命杖脊赦之。九重之上。乃能究極民情如此。

臨安有諺語。凡見人不下禮。呼曰強團練。余不知其所自來。後得之長老云。錢氏有國時。攻常州。執其團練使趙仁澤以歸。見王不拜。王怒。命以刀抉其口至耳。丞相元德昭救解云。此強團練。宥之足以勸忠也。

遂以藥附創送歸於唐。故至今以爲美諺。

皇朝玉牒。昉于至道。所載自太祖太宗秦王以下。子孫凡六百六人。公主附之。書以銷金花白羅紙黃金軸。銷金紅羅標帶。複墨漆飾金匣。紅綿裏金鎖鑰。宗室始本支。次女氏。次始生。次宗婦。次宗女。次宮院。次官爵。次壽考。次賜賚。然秦王以下。太祖本支。第云同姓。惟太宗已來。稱宗室云。

慶元四年九月朔。太史言月食于夜。而草澤言食在晝。驗視如草澤言。嘉泰二年。日食五月朔。太史以爲午正。草澤趙大猷言。午初三刻食三分。詔著作張嗣古。監視渾儀。祕丞朱欽則等覆驗。卒如大猷所言。史官乃抵罪。蓋自渡江後。曆差多矣。

范文正之同寅。而失權于韓魏公。程伊川之儒正。而見誚于蘇子瞻。丁謂之小人。而始薦于王元之。蔡京之姦邪。而見取于司馬溫公。李丞相之拮据于建炎。而有不展之譏。韓蘄王之威宣于金虜。而有畏懼之議。皆不知其然而然者也。

乾德四年三月。遣僧行勤等一百五十七人。訪經西域。興周五年。北天竺僧天息災與施護。各持梵筴來獻。及中天竺僧法天。有意翻譯。乃詔內侍鄭守鈞。于太平興國寺大殿西度地。作譯經院。中設譯經堂。其東序爲潤文堂。西序爲正義堂。七年六月院成。召息災等三人入院。以所賫梵本。各譯一經。命光祿卿湯悅。兵部郎張洎潤色。法進等筆受綴文。慧達等證義。七月十二日。息災等各上新譯經二卷。詔鏤版入藏。自是取禁中梵筴藏錄半載者。譯之。每誕聖節五月一日。卽獻新經。八年。改譯經院爲傳法院。又置印經

院。十月甲申。出新譯經五卷。示宰相。天禧五年十一月丁丑。以宰臣丁謂。王欽若爲譯經使。四年十二月丙子。夏竦上譯經音義七十卷。景祐二年九月。法護惟淨。以華梵對參。爲天竺字源七卷。

冊府元龜。凡一千卷。三十一部。千一百四門。門有小序。譏自李維等六人。而竄定于楊億。其書止採六經。諸史。國語。國策。管安。孟晏。淮南。呂覽。韓詩外傳。及修文御覽。藝文類聚。初學等書。卽如西京雜記。明皇雜錄等。皆擯不採。其編修官。供帳飲饌。皆異常等。王欽若以魏書。宋書有索虜烏夷之號。欲改去。王文正公謂舊文不可改。又如杜預以長歷推甲子多誤。皆以誤注其下而不改。帝下手詔。凡悖逆之事。不足爲訓者。刪去之。復親覽。摘其舛誤。多出手書詰問。或召對指示商略。凡八年而成。然開卷皆常目所見。無罕覯異聞。不爲藝家所重。


張佛子名慶。京師人也。以淳化元年生。生三歲而父母俱亡。亦無伯仲昆季。遂養于外戚趙氏。洎長。因襲姓趙。亦未知自明。趙氏之鄰有郭榮者。世爲右軍巡院吏。趙氏因以慶屬焉。郭氏告老。慶遂補郭氏之闕。實祥符三年也。慶之司獄。常以矜慎自持。好潔。獄囚必親沐之。暑月尤數。每戒其徒曰。人之麗于法。豈得已哉。我輩以司獄爲職。若不知恤。則罪者何所赴愬耶。飲食湯藥臥具。必加精潔。常爲其徒悔之曰。若區區爲此。乃欲要福乎。慶亦莫之顧也。好看法華經。每有重囚就戮。則爲之齋素誦佛。一月乃止。囚有無辜者。欲私釋也。取具去。乃祝之曰。若無舉我。願以具贖若也。坐罪後遇囚得報。必自免其囚。獄有訛鞠者。慶以至誤于畫條。令美言以喻之也。不訊考而疑獄常決。獄官往往屬意焉。後慶年八十有二。無病而卒。其

子亨官三班借職。亨六子洪、左、藏、庫、副、使、鏐、鐔、鐸。元豐五年同登黃裳榜。鎬、銳並顯薦。聞封陰德。有後乃如此。

轉運使盧之翰爲李繼隆誣奏。轉運乏糧。太宗怒。召中使取之。翰等三人首時。丞相呂端不敢言。樞密副使錢若水犯顏力諍。之翰等得免。黜爲行軍副使。後之翰于都堂見錢。長揖不謝。呂丞相在坐。謂盧曰。君言樞相更生耶。盧大言曰。錢公此舉。使明主不拒諫。大臣敢直言。律法無枉濫。所當謝者。在彼不在翰也。呂爲慚然。

太玄極爲本朝儒舊。詆議然。司馬溫公法之以著潛虛。邵康節每謂揚雄太玄不獨知曆法。且知曆理。有仇生者。少與富鄭公善。後以失權去。游于韓公之門。未幾韓富不協。遷怒仇。謂背有所短也。及魏公卒。富公至不往弔。且欲甘心于仇。或謂仇須面詣謝。仇曰。刺骨之恨。豈送面可消。但富公正人。韓公君子。短正人于君子之前。能不入于妒婦之條乎。富公聞之。于是釋然。所謂難以情求。可以理諭也。第不弔韓公。至竟爲富公身後名累。

余嘗見太子玉冊。用珉玉簡六十枚。前後四枚。刻龍填金。貫以金絲。藉以錦褥。盛以漆匣。裝以金華飾。以螭首。今請用珉簡七十五枚。

A decorative border with a horse illustration at the top. The border is composed of intricate, swirling patterns. At the top center, there is a silhouette of a horse in profile, facing left, with its tail slightly raised. The horse is surrounded by stylized, swirling patterns that suggest clouds or water.

黃氏日抄古今紀要逸編

黃震撰

黃氏日抄古今紀要逸編

本館據知不足齋
叢書本排印初編
各叢書僅有此本

序

南宋黃文潔先生所傳古今紀要。自三皇迄宋。上下數千餘年。文約而義備。其開天運。否泰。人事得失。生民治亂。歷祚興廢之數。概可觀矣。迺撰次止及神宗。而徽、欽以後皆闕焉。豈所謂定、哀之閒。微其詞耶。攷先生當度宗朝。以史館檢閱入對。目擊國家禍亂之兆。危在旦夕。而痛哭直陳。不避譴謫。蓋居其官則盡其職。道固如此。則徽、欽以後之無傳。自不同定、哀之例。其爲簡帙之散亡無疑也。吾友同亮篤志好學。積有歲年。博通經史。于子集諸書。靡不究極。凡遇奇字疑義。必手自搜討。註釋而後已。或得古人斷簡殘編。亦必珍而藏之。以備訂補。因出其先太僕公所抄理、度兩朝紀要。得之滎陽鄭氏者。授之梓人。而是編之散者。以收。斷者以續。俾學者習其書。而信其傳。抑可謂文潔之功臣矣。顧哲宗以後。理、度以前。尙有徽、欽、高、孝、光、寧。未備。同亮心用爲怵。凡物必聚于所好。以同亮之篤志好學如是。吾知是編之散亡者。必將盡出。以續成東發之完書。而大慰同亮之積願。如豐城之劍。終必復合。余雖老而秉燭。且樂從同亮之後。爲之鼓舞而稱快焉矣。年家眷同學弟左臣黃頓首拜譔。

序

宋黃東發古今紀要第二十卷。明四明陳燮五大僕得之。其鄉鄭千之所輯四明文獻。太僕子同亮謀鏤板以廣其傳。此卷自前代葉文莊邵宏齋皆云未見。蓋逸編也。歷四百餘年。而後出人閒。學者寶之。如天球琬琰。吁其難也。在昔先民之著述備矣。陵公變遷。蕩爲煨燼。而此獨從荒林破塚。蛛絲煤尾閒。拂拭出之。蓋所紀國運汗隆。人材臧否。抉發幽潛。破除回逴。可以興起百世。爛戒千秋。精神所注。不容遏抑。然非世之鴻生魁士。以網羅放失爲己任。安見其故漫漶磨滅也。使當日早有篤學好古。如三君子者。到此書不待久而後出。然正惟其收之放失之餘也。故愈可矜貴。若徽、欽、高、孝、光、寧六朝。揆之以理。必不中闕。今尙未爲全書。然越數百年。而有三君子矣。安知自此數百年中。不又有篤學好古。如三君子者。舉其廢墜也耶。故鋟其已得者。附諸黃氏日抄。而缺者。姑以俟諸異日。丁丑十月。客延平。獲與同亮先生友。先生出此卷見示。因略敘簡端如右。東吳同學弟趙俞書於吸江樓。

黃氏日抄古今紀要逸編

宋 慈溪黃 震東發撰

本朝

理宗 初即位。仍委舊輔史彌遠。淵默十年無爲。彌遠薨。端平元年甲午。始親政。相鄭清之。收召一時知名士布之朝。號稱更化。然斥逐彌遠黨人。雖盡清之開邊誤國。中外反益大耗。明年遂並相喬行簡。尋又相崔與之。不至。又明年。因宗祀大雷電。上乃逐清之。獨相行簡。行簡得政。分邊防。委李鳴復。分財用。委余天錫。人猶惑焉。嘉熙三年。行簡請老。優以平章重事。而相李宗勉。宗勉清儉。有時名。中外方賀得人。未幾不幸以疾薨。越明年。歲在庚子。召都督史嵩之入相。嵩之尙權術。用濮斗南。劉晉之。而尤忌杜範之賢。淳祐四年甲辰。丁父憂。置急遞。移朝事決之家。而留范鍾爲相。塞賢路。以謀起復。徐元杰在經筵。首沮其議。上素注意杜範。每比之司馬公。至是乃親擢範爲相。傾心委任之。時範已病。亦力疾思報。條革時弊。善類相慶。都人驢呼載道。天下方欣欣望太平。會範疾甚。爲相纔八十日薨。游侶以謹愿繼之。爲相嘗置國用房。謀檢計財用出入。不果成。嘗相趙葵。不拜。但罷而清之再相。自丁未迄辛亥。五年閒。奄宦董宋臣之爭。以贖貨蠱探。所誤又不止國事矣。至謝方叔。吳潛。董槐。程元鳳。相繼爲相。皆無能救其弊。方方叔子弟招權。誤用余誨帥蜀。殺王惟忠無罪。公論尤少之。潛雖素有才望。不喜任術。上不甚親信。惟槐清勤有守。元鳳有度量。而太樸茂。引丁大全同列。爲大全孩侮。而奪之位。斥辱士大夫。聚

羣小揜斂苛急如沸。又狎狂衣冠舉動皆怪。遇事率諧謔。天下目爲丁風。卒致己未秋。金兵偷渡。幾危社稷。以貶死。吳潛再相。金已渡江。上與共艱難。拯憂危。而所用無一善類。事定。賈似道由督視入相。怨潛嘗欲置諸危地。潛亦以貶死。然天下冤之。似道既殺潛。威福益張。自是專國柄。歷三朝。稱元老。自拜平章。而輪宰相爲之掌印。聚流俗工爲四六者。日夜歌功頌德。比之周公。以至亡身危國而不知。則又理宗後事矣。

○賈似道始生之日。錢唐宰郭應酉以詞賀之。序語云。峻極于天。誕彌厥月。綵衣廊廟。昔無一品之會。參袞繡山林。今有半閑之姬旦。蓋賈有所生母。朝命封兩國。賜號壽賢。而築新亭于葛嶺私第。扁曰半閑故也。其結聯云。日長門館坐對南北峰之高。時游廟堂。盡付東西廳之閒。賈甚稱賞。遂除官告院。旣而語客曰。此詞固佳。安得有著綵衣周公乎。識者謂晉楚之富。不可及也。曾子猶曰。我以吾仁。我以吾義。是豈較一品者。周公思兼三王。坐以待旦。又豈志半閑者哉。東西廳見韓魏公傳。若南北峰。殆俗語耳。豈一時偶阿其所好耶。詞云。捷書連晝。甘灑通宵。新來喜沁。堯眉許大擔。當人閒佛力須彌。年年八月八日。長記他三月三時。平生事。想天和天語。不遣人知。一片閒心。鶴外被乾坤繫定。虹玉腰圍。閭闔雲邊。西風萬籟吹齊。歸舟更歸何處。是天教家在蘇堤。千千歲。比周公多箇綵衣。○三月三。蓋頌庚申歲草坪之捷。歸舟乃舫齋名也。

理宗隆準龍顏。性天明達。表章正學。排黜異端。肆筆成章。皆該至理。三代以還。帝王講學者。皆所不如。杜

範清苦忠愛。一念致君。爲上所傾信。亦近代君臣遇合之所未有。而天不慙遺。寂無他倚。以致國家卒罹儉人之禍。尙忍言之。痛不言忍而言之。其致變之略有三。宰相也。臺諫也。邊閫也。宰相職在進賢退不肖。以佐天子。而宰相非人。至以公朝之官爵。爲私門之商貨。使請價而得。布滿中外者。皆次第取貨之小人。致變一也。臺諫職在爲天子耳目。以彈劾宰相之非才。而臺諫非人。至以公朝之執法。爲私門之吠犬。使天子不得有爲。而一惟宰相之私。致變二也。邊閫職在與天子分闢而治。死守封疆。以長保塞上之安。而邊閫非人。至以三軍死生。國家安危所寄之地。爲承受中朝權貴。應副人情私囑之奴僕。使邊防蕩然。敵至如入無人之境。致變三也。三者致變。而狄之變始烈。國家仁厚。社稷靈長。已三與狄爲鄰。契丹先嘗寇我。先滅女真。繼嘗寇我。又滅。迨今韃靼始毒我尤甚。初韃靼與女真同種。皆靺鞨之後。其居混同江之上者。曰女真。其居陰山之北者。曰韃靼。韃靼之近漠。尙能火食者。曰熟韃靼。其遠于漠。惟事射獵以爲食。逐水草以爲居。視草青爲一歲者。曰生韃靼。生韃靼有二。曰黑白。而今盛者曰黑韃靼。黑白初皆事女真。黑韃靼至忒沒真。叛之。自稱成吉思皇帝。又有蒙古國者。在女真東北。金亮時。與韃靼並爲邊患。至我嘉定四年。韃靼始併其名號。稱大蒙古國。韃靼于是始大。而忒沒真。爲韃靼始興之主。嘉定五年十一月。忒沒真留大會撒曷。國女真于燕京。而身督三道兵。分取河東。河北。山東三路九十餘郡。數千里生靈。爲其殺戮殆盡。惟有大名。真定。青。鄆。海。順。通州。堅守未破。六年二月。金兵回至燕京。乏糧餓死。亦十三四。女真事之以少女乞和。韃靼退百十餘里。至居庸關。凡所掠三路少

壯男女數十萬。盡殺之而去。是年五月。女真避之。假息我舊京開封。七年七月。夏人遣使求我夾攻。蜀帥董居誼不之報。十月。女真來督歲幣。十一月。遣聶子述與和侍郎劉彊以下。與太學諸生。皆爭稱不可。真德秀言。勢可以報。而反助之。皆不聽。八年。韃靼再南下。破燕京。破潼關。山東羣盜爲亂。女真地勢益盛。始謀窺我江淮。十年四月。寇京西。十二月。寇四川。十一年。李全雖因亂。以山東歸我。十三年。夏人再謀夾攻。皆敗。自是無歲不入寇。西陷鳳州。及興元。中陷蘄黃。東亦圍及滌。濠李全尋亦反噬。辛卯歲春。雖幸其自斃。鄭損是歲。方且棄蜀三關。國勢日益岌岌。柄國者。惟務掩覆支持。外恃鎮靜。韃靼迫逐女真。至蔡州。遣使邀我夾攻。會舊相薨。新相鄭清之。銳意乘機。遣邊帥孟瑛共滅之。韃靼歸我俘獲。使薦太廟。以雪前恥。夫以我之積弱如此。韃靼之方強如彼。我因人之力如此。韃靼稱功于我。如彼。使善與交。尙虞後艱。清之反背約。乘虛欲襲。取其無人之地。以誇恢復。遂至趙范。趙葵。全子才。三帥。凡三十萬。盡殲。江南百餘年兵糧積聚。輦載之北。盡空。京。襄。四川。沿邊百郡。盡失。此于致變之餘。又致寇一也。時元主兀窟帖。卽忒沒真弟幹噴之子。代立。韃靼于是再傳矣。去之三十五年。丁大全以狂怪當國。取貨袁玠。使守九江。玠取貨百姓。以償帥債。漁舟不勝其毒。一旦導北舟南來。致寇二也。時元主蒙哥。又兀窟帖弟詭樂之子。韃靼于是三傳矣。初元舟之偷渡也。賈似道正董師江上。事急嘗約元和。已而會曹世雄。斷彼浮橋。蒙哥敗于合州。憤死軍中。寇鄂渚。忽必烈急歸謀立。解圍去。似道因自詭有再造之大功。掩覆約和之事。不復言。元遣使郝經來求如約。似道幽之眞州。十四年不報。元遂得歸曲于我。致

寇三也。時元主忽必烈者，兀窟觸之弟，闔出之子，于蒙哥爲從兄，始效女真，立年號，置官稱，韃韌于是四傳矣。致變三，致寇三，而又值韃韌之方張如此，國欲安得乎？理宗在位四十一年，嘗得皇子早薨，育潛邸母弟之子爲子，是爲度宗。

相丞

杜範，台州黃巖人，端平更化初，入朝首言，不惟未覩更新之效，或者方有浸不如舊之憂，其弊皆原于私之一字，而今吾君吾相，皆未免于私。上除公監察御史，劾江州守臣何炳，丞相私親也，疏匿不行。公言：一守臣之未罷，其事小；臺諫之言不行，其事大。沮臺諫之言，猶可；匿陛下之旨，不行，豈勵精親政之時所宜有哉？丞相鄭清之大怒，奏公粉飾擠陷。公言：丞相之與臺諫，官有尊卑，事關一體，大臣欲扶持紀綱，故必崇獎臺諫。聞有因言而待罪，未聞有諱言而含怒。呂夷簡有社稷之功，而歐陽修論之，文彥博負天下之望，而唐介劾之，況于夷簡、彥博，未能萬一，乃屢牘譏諷，欲與臺諫爭勝負，因率合臺論其事，併論制閹詐謀罔上、清之愈忌之、奪公言職、除太常寺少卿、公五乞歸，上皆不許。復除公殿中丞侍御史，時襄、蜀俱壞，江陵孤危，兩淮震恐，遂極論清之挑橫強敵，幾危宗社，及論其子弟招權納賄，貪冒無厭，盜用朝廷錢帛易貨外國，具有實狀。蜀帥趙彥呐，喪師害國，僉書樞密院李鳴復，交財芘奸，事未行，合臺與太學生交攻之。鳴復猶惓惓不肯去，公謂閣門使于班行手扞之，始出，公亦坐是再奪言職。除起居郎，公扁舟徑歸，尋差知寧國府救荒。嘉熙四年，趣入朝，復言端平更化，相位非人，無能改于其舊，而旁蹊邪徑，捷出爭馳，敗壞汗穢，殆又甚焉，併陳當時宰執與凡內

而百執事。外而邊帥守臣。儉情苟安。徇私忘公之弊。忠憤感發。聞者歎竦。自是遇事無不極言。淳祐二年。除同知樞密院事。先是當國者專權。同列但押敕尾。公既入都堂。凡行事有得失。除授有是非。悉抗言無隱。時相史嵩之。雖外示涵容。內甚忌之。劉漢弼入臺。劾右正言葉賈。賈亦繼劾漢弼。既俱罷。獨賈寵閑職。公言賈先被劾。已爲罪人。尙處臺諫之權。以爲報復之地。其罪尤重。而反寵之。退復嵩之曰。濮斗南。劉晉之。小人無忌憚者。丞相何不去之。乃復畱要地耶。嵩之滋不悅。俄除晉之諫議大夫。四年正月。除公知樞密院事。亦除李鳴復參知政事。使公差同列而自去。公卽日竟出關。上亟遣中使召回。且敕諸城門不得出。公會太學諸生。伏闕畱公。而斥鳴復。且併及嵩之。嵩之乃急遣其客劉機。密約晉之輩。併論公與鳴復。公始得遂其行。會嵩之遭喪。謀起復不果。拜公右丞相。中外嚙呼相慶。上親書開誠心布公道集衆思廣忠益賜之。公上五事。一曰正治本。謂行旨當嘗出于中書。二曰肅宮闈。謂宮府當同出于一體。三曰擇人材。謂當隨才授任。久于其職。毋徒守遷轉之常格。四曰惜名器。謂如文臣貼職。武官閣衛。不當爲徇私市恩之地。五曰節財用。謂近自上始。而考封樁國用之出入。求鹽筴楮幣之更變。且乞早定太子。凡內降盡封還。堂闕盡撥還吏部。上求治益急。命宰執各條政事。公條上十二事。皆當世要務。孟珙久擁兵上流。人疑其難制。公戒以同心徇國。毋以術相籠駕。珙感謝。願效死不辭。元兵大入五河。絕中流。置營柵。且以重兵綴合肥。冀必取壽春。公命維揚鄂渚。東西策應。元卒敗去。計功行賞。無不曲當。軍士悅服。公孜孜體國。雖疢疾不廢機務。爲相纔

八十日薨。年六十四。上震悼。御札賜諡清獻。公有令質。以聖賢格言爲實踐躬行。有田僅二頃。平生不增尺寸。室廬僅庇風雨。自公未貴。人已比之司馬公。上亦嘗以司馬公目之。其後清修苦節。身若不勝衣。至臨大節。賁育不能奪。天下候其出處爲休戚。得政未及盡設施。遽薨。背識與不識。皆相弔。失聲。輜車所過。聚祭巷哭。其迹往往類司馬公時。司馬公承新法蠹民之弊。可決裂變之一旦。公乘權臣遽壞風俗之弊。非一旦可變。此其效爲不同。然司馬公受知宣仁。公受知理皇。皆所謂千載一時。乃皆天奪之遽。志士仁人所爲掩卷於邑。而不能已已者也。前乎公爲相者。李宗勉以清儉名。後乎公爲相者。游侶董槐。程元鳳。皆世稱善類。其可相而堅不肯相者。是曰崔與之。

崔與之。廣州人。寧廟朝。詳刑廣西。除害雪冤。不勝紀述。帥淮東。首急邊防。浚濠廣十二丈。深二丈。西城濠勢低。疏塘水爲限。朔月河釣橋。因潞陽山林。創五寨。結忠義。分維揚兵。同習馬射。又欲募民爲萬馬社。時相不果行。李全來歸。公謂必有後憂。劉瑋潛以密劄取泗州。大敗致寇。而欲和議。公謂不可行。時相皆不果從。以召還。會蜀亂。復帥成都。尋令護西蜀。先是將帥以不協敗。公至。勵以大義。將帥協和。而軍政始立。先是安丙納韃。夏合從之請。會攻秦鞏。韃。夏爽約不至。而我師敗。公至。諭以通使。當專介持書。不可輕兵徑入。而韃。夏始不敢私有請。先是邊民歸附者。疑不敢納。公至。鑊板邊關。開諭招納。金自是上下相疑。以至于亡。他如增馬價。而馬政始舉。飭關隘。而邊防始密。初至庫錢數。僅踰萬。後至千餘萬。蜀知名士無不薦。沔帥趙彥呐。時最有名。公獨察其必誤事。囑時相勿用之。後

彥呐竟亡蜀。終公在蜀。金不敢犯。後公以疾告歸。朝廷以鄭損代公。金諜知之。卽大入。公再爲一臨邊。金退。乃還除禮部尙書。不拜。便道徑歸廣州。

理宗卽位。除帥長沙。帥江南。辭除吏部尙書。至親洒宸翰以趣之。皆力辭。金亡。朝廷議取三京。公聞之。頓足浩歎。繼而予祠。亦辭。廣州軍亂。就除廣州。旣拜命。盜甫平。卽解印辭。拜參知政事。拜右丞相。皆終辭。至十有三疏。嘉熙三年。乃得致仕。其家居祠廩。月財量受數十千。自嘗領鄉郡。絕不復受。凡俸餘。皆以均親黨。致仕之歲。十月一日薨。遺戒不得作佛事。得壽八十有二。公之不作相。天下至今高之。公豈以不作相爲高者哉。天下安危。繫于邊關。或乃視爲貨賂交私之地。公帥淮帥蜀。嘗獨盡心焉。而不得行。天下事已可知矣。及金滅韃興。正國家當憂危之日。反挑強敵。以開厲階。天下事又可知矣。尙何相爲。故傑然之材。惻然之心。超然之見。近世惟公一人而已。公豈得已而辭者哉。然則天下素所望其爲相者。眞德秀言論丰采。文行聲績。獨重嘉定。寶紹閒。僉謂用則卽日可太平。端平親政。趣召至朝。正當時道升降安危之機。略無一語及之。乃阿時相鄭清之飾。其輕舉敗事。謂爲和扁代庸醫受責。又以清之開邊地。建議御關。卒以府庫不足犒賞。事不可行。殿前諸軍質貸備衣裝。無以償。故閔延及州郡兵皆閔。自是軍政不復立。公知貢舉事。復喧罵出院。除政府。未及拜。以疾終。又有將欲相之。而不及相者。袁甫端直廉靖。敷歷多惠政。立朝所值時相。皆鄉人。前後無一語阿私。于史彌遠則言其老當還政。于鄭清之則言其履危害民。于史嵩之則言其不可爲相。又嘗因邊

邊條上十事。皆切時務。聞李宗勳薦爲相。上方欲相之。會以病終。

唐璘。威武古田人。擢監察御史。首疏言丞相鄭清之用時文之才。爲經世之具。不顧民命。輕挑兵端。不度事宜。頓空國幣。委政厥子。納交商人。賄塗大開。小雅盡發。瑣瑣姻婭。敢預邪謀。視國事如俳優。以神器爲奇貨。都人側目。朝士痛心。蓋正無將之誅。以著不忠之戒。○自註邪謀之說。讀之驚人。而世罕知其事。嘗見蔣峴尙書家子弟言。理宗丙申四月。乍暖。飲糖霜水過多。致疾頓甚。汪之道有異謀。欲奉上爲太上皇。賈似道聞之。密告其姊貴妃。轉聞上。先事亟逐之。或誅之。凡其黨。盡屬蔣峴。以他事黜之。之道出入清之相府最密。併疑及清之。是年秋。宗祀雷變。并逐之。清之未必知其謀。璘之論及此。亦風聞也。之道惟謫居婺州。終其身。上寬厚。亦終不加誅。○又彈鄭清之妄庸誤國。縱其子世昌。移易公家五十萬緡。受殿帥王鑑十萬緡。彈鄭性之懦而多私。黨庇姦庸。彈李鳴復。詔鄭損得薦。迎合鄭清之。得擢臺端。交結史賓午。得登政府。會杜範亦彈鳴復。不行去國。璘遂七疏乞出而去。王萬。婺州寶婺人。除監察御史。會史嵩之自江右督師入相。萬直論其不可不聽。出萬爲大理少卿。萬卽日扁舟徑歸常熟縣寓舍。五得除。皆力辭。卒致其事。嵩之敗。上思其言。手詔褒之。賜田五百畝。錢五千緡。贍其家。

洪咨夔。臨安於潛人。除監察御史。擊逐史彌遠貪黨居多。會同臺王定。誣詆正人。劉漢弼咨夔攻定。遂與定俱出臺。先是崔丞相帥淮帥蜀。皆辟與偕行。禮爲上賓。理宗立入朝。言濟王之死。非陛下之

心當國者。恚之。輪對又言。李全必有後患。遂鑄罷。端平入見。會蔡州以完顏守緒骨來獻。時相侈爲盛事。以薦太廟。咨夔奏。寒灰而認殘骸。雖離婁無所用其明。況與強爲鄰。抱虎枕蛟。事變叵測。顧可侈因人之獲。使邊臣論功。朝臣頌德。且陛下知慕崇政受俘之元祐。獨不鑒端門受降之崇寧乎。咨夔在嘉定。寶紹不合。在端平又不合。素行既高。又文足以達。故一日入臺。丰采震天下。時蔣重珍。王遂。郭磊卿。皆入臺。有直聲。劉漢弼再入臺。攻史嵩之。直聲尤著。既沒。上賜贈其家。加于王萬。且諡之曰忠表。其閭爲忠諫坊。凡皆臺諫之賢。臺諫國之紀綱。理宗能一一崇獎之。四十年之治。多繫其力。故敬錄其人如此。然臺諫爲天子斥逐權奸。使不得害于而國。固專任臺諫之力也。臺諫爲權臣用。空其善類。使天子孤立而國以危。亦專任臺諫之弊也。臺與諫爲虛位。君子居之。國之福。小人居之。國之禍。小人十常八九。君子十無一二。二者之分。在爲天子用。及爲權臣用耳。故天子以親擢臺諫。爲賢宰相。以不私薦臺諫爲賢。臺諫以不阿私宰相爲賢。臺諫官本九品青衫。一經親擢。卽權重宰相。祖宗立法。意果何在。柰何不問其人之賢否。而一切任之乎。不辨其言之是非。而一切從之乎。理宗于臺諫之非其人者。夜半片紙。時加斥逐。故終理宗世。國家無已甚之禍。其人不足以汗簡冊。故不錄。在法臺諫不報謁士大夫。而近或遍發邊關監司郡守書。使曲獄私舉。以濁亂天下。在法臺諫避嫌鄉郡。而近或劾其鄉之郡縣長吏。使子弟僮僕。皆得橫行州縣。在法臺諫搏繫權奸。不毛舉細故。而近或聽游士受賂之言。取縣令振職。抑豪強。正稅籍者。率鑄罷之名曰日課。使人才摧折。根本

大壞窮民反代豪強納官。至于重輸白納。而無所訴。凡此三者。雖皆臺諫末流之弊。有能申明著之。令甲亦非小補云。

度宗立十年。恭儉小心。委政舊輔賈似道。值年穀屢登。四方無虞。似道益以驕肆。遠違君父。養傲湖山。自號半閩老人。而遙制朝廷之命。不知皆天所以益其疾。咸淳十年甲戌七月。上崩。是年十二月。元兵北渡。國事遂至于不忍言。似道亦竄謫死矣。初似道恃其姊貴妃勢。游狎博戲。爲市井無賴。理宗知之。不用。史巖之薦擢金部。以刻薄稱職。得爲京湖總領。京湖財賦淵藪。似道復倚勢。重催一二十年。已獨無納虛名之賦。至斬吉州都吏。又逼主管官死之。諸道官吏。以性命故。破產倍償。賦益川湧。山積。用以買譽游士。談其有宰相度量。得帥兩淮。又得帥京湖。又得以宰執恩數。盡護諸道兵。己未秋。元兵初偷渡鄂渚。似道時以督視置司漢陽。力未及沿邊上下。理宗皇帝每璽書痛責之。賴印應飛守鄂渚。上則王堅守合州。下則史巖之守江州。前則向士璧守潭州。兵勢聯絡。威權不至旁出。又賴曹世雄斷浮橋于涪州。使彼兵中斷。而元主蒙哥爲王堅所挫辱憤死。攻我鄂州之酋。忽必烈者。蒙哥從兄也。聞之急歸謀立。亦解圍去。方賈似道事急之際。嘗約議和。已而往來鄂州。與其守戰。嘗獲捷。及元兵解去。遂掩和議不言。而自詭再造之功。又得奏凱歸朝。正席廟堂。爲右丞相。爲平章重事。自此不復言兵。唯日聚諛佞。歌頌太平。以實其欺。元遣使督和議。則幽之不報。將士定勞。江上者。陳乞功賞。則抑之不行。諸帥如曹世雄斷橋功第一。則忌其功。貶竄殺之。印應飛。向士璧。則竄以城守公費。皆殺之。史巖之諸舅也。

廢絀之。王堅雖賞功召還。實亦置之閑地。惟有呂文德爲之腹心。與之表裏相私。一切恣其橫。似道奮歷財賦官。中外孔眼。洞知纖悉。富郡使膏梁尸之。而取其賂。制司使淳謹代之。而課其贏。淮東監司利入甲諸路。使制司兼之。不置本司一官。而盡籠其利以入己。惟呂文德代爲京湖制總。備知其欺。謾首尾。故又一切恣其貪。文德起土豪趙葵。始擢之爲將。似道始結之爲大將。沿邊數千里。皆歸其控制。所在將佐列戍。皆俾其親戚私人。累其官至保傅。換授其子師夔。至法從。貴亦至矣。京湖兵在岳鄂王時。額三十萬。史嵩之初爲帥時。尚二十五萬。似道自爲帥時。尚二十萬。李芝庭自淮東爲帥時。尚十七萬。至文德減至七萬。而掩取六十四州。養三十萬兵之賦。入爲己有。又用私人戴埴者。名總領歲科。降朝廷金帛錢楮三十萬。瓜分爲己私。以至寶貨充棟宇。產遍江淮。富亦極矣。揣分而言。何啻大過。然文德愚鄙小民。不識字。每佯癡。好無禮士大夫。似道旣入相。文德自京湖口授人寫醜語。罵似道不敢怒。甚至初爲郡。不冝禮祭先聖。罵其不曾教我識字。客將陳故典。力請再三。而後從。性尤忌切而貪寶。初諸將旣盡用文德私人。獨曹世雄。劉整。才高不冝屈。劉整與曹世雄同斷橋。功成。文德深忌之。似道奪其功。以歸文德。貶世雄。移整瀘州。又使整之仇俞興帥蜀。整虞禍之將及也。大遣賂慶文德。生朝。乘其閒。亟叛歸。爲元任責圖江南。似道又素建議。襄不必守。己未之警。有爲白割請棄襄者。上封以示似道。似道奏乘此棄之無傷。方似道至京湖。首取善守襄者。高達歸其幕。後劉整因啗文德。以玉帶。給于我境。白河開榷場。築土牆以護商貨。且擇玉帶尤美者。繫使者腰以耀之。文德受其帶。又兼取使者帶。使登

得一夜築鹿門城。截我襄城。于其城築之。北大發兵圍襄。似道徐遣愛將范文虎救襄。文虎尤愚鄙。不才。買歌童舞女。謳歌于郢上。六年而不進。襄破敵兵長驅。凡前將士之求賞不獲者。皆解體。時文德已死。文虎呂壻也。與師夔盡帥沿邊將帥。凡呂之親戚私人。自大將夏貴、陳欒而下。皆降。似道復出視師。見其然。不敢發一矢而遁。國事遂有不忍言者矣。方無事時。嘗相葉夢鼎、江萬里、馬廷鸞。似道皆不與之權。權歸省吏翁應龍。除王燾知樞密院。將相之燿不屑。微服泛海逃。夢鼎諸人亦恥之。稍久。輒力引去。至無官爲相。有陳合者。檢陳故事。淳熙間相位。嘗虛兩年有七月。似道大喜。相位遂久虛。而合以得峻擢。似道晚年。事皆仰成翁應龍。似道所欲逐。有臺諫不敢任責者。亦應龍爲疏。糞以付合臺。似道敗。應龍伏誅。凡倚似道取貨淫樂者。皆誅之。

按東發黃公著續通鑑。其中興大要。本李公心傳繫年錄。與朝野雜記。理度兩朝。則公在史館。多得于見聞者。文約事詳。亦可謂良史矣。夫理宗以支庶入繼大統。四十餘年。君子小人。更進迭用。治亂消長。固可爲當時之一概矣。至于度宗十年之政。一則賈氏。二則賈氏。在朝之臣。無有以國事爲言者。襄陽被圍。久弗克救。北兵駭駭。近在江左。帝也。迄罔聞知焉。使宮車晏駕。少忍須臾。其不牽羊肉。祖爲燕薊之俘囚耶。何至于孤兒寡婦。而始嬰其禍哉。公之作此書。至賈氏旣敗而終。其憂深思遠。可謂至矣。故其論宰相臺諫邊圍之非人。所以致強敵之憑陵者。尤拳拳焉。夫公在咸淳德祐之際。其所見所聞如此。今之士大夫。處于至正之朝者。其所見所聞。當有甚焉。想夫社稷之亡。山河之易。

未及百年。殆無有今昔之異者。遺民之痛。其不至于慟哭而流涕者乎。昔孔子作春秋。昭、定、哀之閒。多特筆。公于理、度、兩朝。其致意于世道之終也深矣。斯其善學春秋者哉。固取而著之于此。以爲亡國之鑒。而其他有不能盡錄也。歲在庚戌三月十四日。滎陽生鄭真識。

刻古今紀要逸編跋

東發先生黃氏日抄合經史子集凡九十七卷自宋以來通行天下矣其古今紀要起自三皇至宋神宗止卷凡十九葉文莊云古今紀要十九卷當與曾先之史略竝傳是文莊之所見者亦止神宗也及見邵宏齋宏簡錄序則云黃震之脩寧理二朝紀多散佚不傳文獻無徵後之作者有其志而不逮悲夫悲夫又知日抄之紀要不止于神宗宏齋亦付之無可如何矣先大夫留心史志蒐購遺書鈔得鄭千之所輯四明文獻內有東發兩朝紀要余閱見狂喜天下固有湮沒數百年而一旦復出者乎非有鄭滎陽之稽古采葺先大夫之好學廣搜則此卷亦終于銷滅矣獨是神宗以後尙有徽欽高孝光寧六朝不知滎陽何以弗錄豈東發所紀原闕是六朝乎抑紀之而散佚卽滎陽亦未得見乎是未可知也顧卽此卷而談信耳信目多足補宋史之闕文眞赤水之遺珠也安可使其已獲而再墜乎此後學之責也因付梓人公諸海宇甬東後學陳自舜同亮甫謹識

